

20. januar 2015

UPA 2016/34

Inatsisartut suleriaasianni § 33 naapertorlugu Naalackersuisut peqquneqarnissaannik Inatsisartut aalajangiiffigisassaattut siunnersuut matumuuna imaattoq saqqummiuppara

Kalaallit Nunatsinni aalisakkat qaleruallillu tunisassiassatut qaqqineqartartut ingitaqarani tamakkiisumik tunisassiarineqartarnissaat anguniarlugu Naalackersuisut UPA2017-imi nassuiaammik saqqummiusseqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Jess Svane, Siumut)

Tungavilersuut:

Aalisakkanik qalerualinnillu tunisassiorneq maannakkut ukiorpassuannortuni ingerlanneqareerpoq, aammalu avatangiisivut paarilluarutsigit sulii ukiorpassuarni ingerlanneqassalluni nunatsinnut aningaasarsiornikkut iluaqutaanerpaatut inissisimalluni.

Ullumikkut Naalackersuisooqatigiinni anguniakkatta pingaarnepaat ilagaat aalisakkanik qalerualinnillu tunisassiat atorluarlugit sapinngisamik nunatsinnut innuttaasunullu aningaasarsiornikkut annertunerpaamik iluaqutaasuunissaat anguniarlugu tunisassiornerit tamarmik aqqissuunneqassasut, taamatuttaarlu avammut niuernikkut aqqissuussinerit tamatuminnga siunertaqartumik aqqissuunneqassasut. Taamaammatt siunnersuut manna Inatsisartunut saqqummiuppara, anguniakkat taamaattut oqallisigerusaaginnarnagit piviusunngortitsiviusumilli kinguneqartinnissaat angujumallugu.

Ullumikkut aalisagarpasuit qaleruallillu nunatta imartaaniit qaqqineqartarput ilarpasui lu annertunerusumik suliarineqaratik nunatsinniit annissuunneqarlutik, tassa imaappoq nunatsinni tunisassiarineqarlutik tamakkiinerusumik suliarineqarunik sulii aningaasarsiornikkut annertunerusumik iluaqutissanngortinneqarsinnaassapput.

Nunatsinni suliffeqarfiit assigiinngitsut aalisakkanik tunisassiornerminni suliarinnittariaatsitsigit assigiinngitsunik ingerlaavartuunngikkaluamik misilittagaqartut nalunngilara, taamattumillu tamakku misilittakkat aamma atorluarlugit nutaanillu eqqarsarluni aqqissuusisoqarsinnaavoq nunarsuarmiogatitta inuiaat assigiinngitsut piumasaannut naleqqussakkanik.

Assersuutigalugu aalisagaq tamakkivillugu tunisassiarinerqarsinnaavoq, soorlu nunani aalisarnikkut suleqatigisatsinni Danmarkimi, Norge-mi, Isaland-imi allanilumi taamaaliortut. Aalisakkat allaat saarni panertiterlugit tunisassiarineqarput, qaleruallit qaleruaat qajuusaliaralugit allatullu suliaralugit nioqqutissiarineqarput, saarullit tingui aqajarui uluaallu immikkut tunisassiarineqartarlutik. Ila aalisakkat tamakkiisumik tunisassiarineqarsinnaanissaannut periarfisat amerlannguatsiaqaat.

Naggataatiguit siunnersuutigissuara siunnersuutigineqartoq Inatsisartunit isumaqataaffigineqassapat Nalakkersuisut suliaakkiissutigineqartumik naammassinnikkunik Inatsisartunut nassuiaammik saqqummiussaqaarnissaat Inatsisartunit piumasarineqassasoq.

Namminersorlutik Oqartussanut pisortanullu aningaasatigut allaffissornikkullu kingunissai:
Annikinnerusumik aningaasartuuteqassaaq, aningaasanut Inatsisikkut aningaasaliissutaasut iluanni aningaasalersorneqarsinnaasunik.

Namminersorlutik inuussutissartunut aningaasatigut allaffissornikkullu kingunissai:
Soqanngilaq

Inunnut ataasiakkaanut aningaasatigut allaffissornikkullu kingunissai:
Soqanngilaq